

# VEDTEKTER FOR KYRKJEGARDANE I HÅ

"Jfr. lov av 7 juni 1996 nr. 32 om kirkegårder, kremasjon og gravferd § 21."

Vedtekne i Hå kyrkjelege fellesråd 26.08.2015

Godkjent av Stavanger Bispedømeråd 21.10.2015

Gjeldande frå 01.01.2016

## § 1. KYRKJEGARDSTILHØYRING.

Avlidne personar i kommunen kan gravleggjast på den kyrkjegarden i kommunen som ein måtte ynskje dersom dei ikkje vert gravlagde i ein annan kommune.

Dette gjeld og om den avlidne på grunn av sjukdom eller alderdom har budd i eit anna sokn eller i ei anna kommune mot slutten av livet.

Rett til grav på Varhaug gamle kyrkjegard har dei som bur i området kring kyrkjegarden. Dette gjeld dei som bur eller har budd største parten av livet på dei næraste gardane (gnr. 42, bnr. 13, 21, 22, 23 og 27).

## § 2. FREDINGSTID OG FESTETID.

Fredingstid for oskeurner er 20 år.

Fredingstid for kistegraver er 60 år på Varhaug kyrkjegard og på Varhaug gamle kyrkjegard.

Fredningstida for kistegraver er 40 år på Nærbø og Oгна kyrkjegardar.

Festetida er 5 år.

## § 3. FESTE AV GRAV.

Når kistegrav vert teke i bruk, er det høve til å feste ei grav ved sida av, og etter godkjenning frå kyrkjeleg fellesråd, for ei ekstra grav i tillegg når det er bruk for det. Desse gravene utgjer då ein gravstad.

Ved bruk av urnegrav kan ein ikkje feste grav ved sida av.

Når festetida er ute, kan gravstaden festast for nye 5 år. Når det er gått 80 år etter siste gravlegging kan festet ikkje fornyast utan særskild samtykke frå kyrkjeleg fellesråd. I god tid før festetida er ute skal festaren varslast. Er festet ikkje fornya innan 6 månader, fell gravstaden tilbake til kyrkjegarden.

Ingen kan gravleggjast i festa gravstad utan samtykkje frå festaren. Dersom festaren sitt samtykkje ikkje kan innhentast, kan kyrkjeleg fellesråd avgjera spørsmålet om gravlegging.

Festaren pliktar å melde ifrå om endring av adresse.

## § 4. GRAV OG GRAVMINNE.

Kyrkjegardsbetjeninga vil syte for planering og tilsåing av grava etter gravlegging. Gravminne kan ikkje setjast opp tidlegare enn 3 månader etter gravlegging av kiste. I mellomtida set kyrkjegarden opp eit merke med namnet til den avlidne.

På ny festa gravstad set ein opp gravminne i bakkant av den grava som er teken i bruk og vert ståande der til fredningstida og eventuelt festetida er ute.

Gravminnet skal godkjennast av kyrkjevevjen før det vert montert.

## § 5. PLANTEFELT.

Framfor gravminnet er det høve til å opparbeide eit plantefelt i høgde med bakken rundt.

Kantstein omkring plantefelt, dvs. minst tre rette steinstykke som blir lagt/sett på tre sider av plantefeltet eller liggjande plate framfor gravminnet, skal flukte med terrenget omkring.

I fallande terreng skal kantstein og plate trappast i forhold fundamentet til gravminnet. Plate og fundament skal ikkje vera same stykke.

Heil eller delt plate, med eller utan hol til planter, skal leggjast i drenerande masse og være 4 - 8 cm tjukk. Avstand frå plantehol til ytterkant av plate skal være minst 8 cm.

Heil eller delt plate skal ha same lengde som fundamentet til gravminnet, og bredde inntil 65 cm, målt frå bakkant av fundamentet.

Ved montering av heil eller delt plate, med eller utan hol til planter, skal eigar gjennom avtale med kyrkjeleg fellestråd påta seg ansvar for skader påført ved vanlig drift og vedlikehald av kyrkjegarden.

Det er ikkje høve til å bruke faste dekorting, så som liggjande plater, blomsterurner, lykter m.v. utafor plantefeltet. Lause dekorting skal fjernast etter bruk.

Det kan ikkje plantast vokstrar som er høgare enn gravminnet eller går ut over plantefeltet

Dersom det ikkje er aktuelt å ha plantefelt, skal det vera grasbakke på alle sider av gravminnet.

## **§ 6. PLANTETILFANG.**

Planter, kransar og liknande tilfang som vert nytta ved gravferd eller ved pynting av grav, og som endar som avfall, skal vera heilt komposterbart.

## **§ 7. STELL AV GRAV.**

Den som er ansvarleg for frigrav eller er gravfestar har rett og plikt til å stelle den grava han har ansvaret for. Plantefelt som ikkje vert tilplanta og stelt skal tilsåast av den ansvarlege eller av kyrkjegardsbetjeninga.

Kyrkjeleg fellestråd kan syte for årleg planting på grav mot betaling.

## **§ 8. GRAVSTELLSAVTALE.**

Mot innbetaling av ein bestemt sum, vil kyrkjeleg fellestråd overta ansvar for planting og stell av gravstaden. Det skal i kvart einskild høve opprettast gravstellsavtale. Den innbetalte summen skal dekkja utgiftene til vanleg planting og stell av gravstaden i ei fastsett tid.

Gravstellsavtalen kan ikkje opprettast slik at det varer lenger enn den fredingstida eller festetida som ligg føre. Dersom det oppstår slike økonomiske forhold i avtaletida at midlane ikkje rekk til, skal ein gje melding om dette til den som er ansvarleg, eller til festaren. Det er då høve til ny innbetaling slik at det rekk tida ut.

Kyrkjeleg fellestråd fastset den årlege prisen for gravstellsavtalane.

Ved avslutning av avtalen før avtaletidas utløp, vil beløp ein har tilgode betalast attende til festaren.

## **§ 9. BÅREROM.**

Alle gravplassar har bårerom med kjøle som disponerast av Kyrkjeleg fellestråd. Slike rom skal berre nyttast til å ta vare på avlidne i tida fram til gravferda. Ingen har tilgjenge utan etter løyve. Liksyning kan berre gjerast etter samtykkje frå den som syter for gravferda og vedkjem ikkje dei tilsette.

## **§ 10. NÆRINGSVERKSEMD.**

Næringsdrivande som ynskjer å driva verksemd på kyrkjegarden skal ha løyve frå kyrkjeleg fellestråd. Løyvet kan kallast tilbake dersom vedkomande ikkje retter seg etter dei reglane som gjeld. Slik verksemd kan berre omfatte montering og vedlikehald av gravminne, planting og stell av graver.

Kyrkjegardsbetjeninga kan berre utføre oppdrag for private og næringsdrivande etter oppdrag frå kyrkjevjerja. Betjeninga kan ikkje ta imot godtgjersle for sjølv å utføre tenester.

Dei kan heller ikkje engasjere seg i sal og tenester som har med kyrkjegarden å gjera.

### **§ 11. NEDSETTING AV URNE.**

Det er ikkje høve til å setje ned urne utan at dette er meldt kyrkjeverja og utan at kyrkjegardsbetjening eller andre kyrkjeleg tilsette er tilstade.

### **§ 12. BEVARINGSPLAN.**

- 12.1 Det vil verta utarbeidd ein eigen bevaringsplan for kyrkegardane i Hå kommune.
- 12.2 Varhaug gamle kyrkjegard er regulert som historisk, antikvarisk og kulturell med lokal verneverdi.  
Omarbeiding av rammegraver til plenfelt kan ikkje tillatast.
- 12.3 På Varhaug gamle kyrkjegard skal gravsteinar som vert montert være i gamal stil og ikkje framheva seg. Heilpolerte steinar, lykter, vasar og porselensbilete vert ikkje godkjende.